

晉記卷五十五

十六國錄

蕭山郭 倫撰

十六國錄

昔者三代之治。先內而後外。其於正朔不及之地。皆卻而弗臣。蓋風氣未開。地之所以別內外也。暴秦思帝萬世。南搜百越。北剔匈奴。不務其本而事其末。十四年而社稷爲墟。漢武好勤遠略。疲弊海內。以弱戎蠻。雖拓地過於三代。百姓嗷嗷。幾乎秦續矣。然而當此之時。函夏封疆之內。無所爲荒服之民也。自宣帝始。納呼韓邪。居之亭鄣。光武亦以南庭數萬。徙入西

河。洎。董。卓。之。亂。汾。晉。之。郊。騷。然。蠢。動。魏。武。分。爲。五。部。  
錯。居。都。鄙。泰。始。太。康。之。際。世。祖。武。皇。帝。復。納。降。十。餘。  
萬。處。之。沃。壤。以。彰。威。德。夫。物。不。忘。本。天。地。之。性。也。厥。  
後。賈。后。悖。逆。諸。王。構。兵。羣。盜。四。起。而。劉。元。海。石。世。龍。  
乘。隙。肆。禍。覆。二。帝。墟。兩。京。迨。琅。邪。南。渡。長。淮。以。北。捐。  
爲。異。域。天。未。厭。亂。氏。羌。迭。擾。太。和。孝。武。之。時。苻。秦。稱。  
伯。中。原。之。民。庶。幾。得。以。休。息。及。其。衰。而。區。區。河。右。蝸。  
據。瓜。分。而。亂。靡。有。定。矣。舊。史。列。爲。載。記。斥。之。曰。僞。李。  
嵩。張。軌。同。於。內。臣。廁。之。列。傳。其。所。記。事。迹。複。沓。牴。牾。  
且。不。年。不。月。錯。雜。而。無。章。夫。僞。諸。國。者。所。以。尊。晉。而。

晉於諸國非實有相制之勢也。軌之子孫或貢或否。而專輒一方。亦如曷之在酒泉也。昔春秋書吳楚曰子而傳則稱王。蓋正其名而不沒其實也。今以晉室之元記列國之事。補其缺略。刪其煩穢。而綜其終始。劉淵以惠帝永興元年據離石。稱漢。傳子聰。孫粲。斬準滅之。從子劉曜起兵誅準。改號爲趙。凡二十有六載。李特入蜀。光熙時子雄稱帝。爲成。雄傳兄子班。及子期弒班。而特弟驤之子壽又弒期自立。改號爲漢。壽傳子勢。而桓溫平之。凡四十有六年。石勒初爲羣盜。後得張賓。據襄國。稱趙。傳子宏。從子虎弒宏。都鄴。

虎傳子遵。鑒冉閔殲石氏。石祗立於襄國。凡二生四子。三十有四年。閔立三年。號魏。而滅於燕。慕容儁初慕容廆自晉初擅遼東。傳子皝。孫儁。世雄東方。而奉朔稱藩。朝廷亦羈縻之。永和八年。儁始稱帝。傳子暉。太和庚午。秦滅燕。其稱帝一十有九年。而廆以永嘉元年。稱大單于。自廆及暉四世。共六十有四年。趙之亡也。苻洪自稱秦王子。健入定關中。健傳子生。淫暴健弟雄之子。堅廢生自立。委國王猛。威化大行。滅燕夷代。陷蜀墟涼。傳子丕。從孫登。凡五世。四十有四年。先是惠帝永寧中。安定張軌見天下將亂。求爲涼州。

刺史雖在西陲。乃心本朝。傳子寔。寔傳弟茂。寔子駿。永和元年。自稱涼王。駿傳子重華。重華傳子曜靈。而重華庶兄張祚。廢曜靈自立。自駿以來。國內雖稱王。然猶奉晉朔。至祚始改建興四十二年。爲和平元年。是歲永和十年也。張瓘張琚殺祚而立曜靈庶弟元靚。元靚立九年。而駿少子天錫弒元靚而自立。復稱西平公。天錫立十三年。當太元之初。而秦滅涼州。自軌至天錫。九公五世。蓋七十有六年矣。當是時。秦撫有區夏。藐小江南。思宏一統之略。遂傾天下之兵。而百萬之師。旣殲倔彊之夫。蜂起由是慕容垂據鄴。復

國爲東燕。慕容冲據阿房爲西燕。姚萇據北地爲後秦。乞伏國仁據枹罕。傳弟乾歸。乾歸傳子熾。熾傳子慕末。共四十有六載爲西秦。呂光據姑臧。傳子紹。纂及弟子隆。凡一十有九年而降於後秦。爲後涼。代王拓跋珪復立於牛川。代自力微。通貢猗盧。始封代地。五世而至什翼犍。秦分其地爲二部。至是復立。改號爲魏。禿髮烏孤據廉川爲南涼。段業據張掖沮渠蒙遜殺業而自立爲北涼。李暠據敦煌爲西涼。西燕傳永凡九年。而慕容垂滅之。垂傳子寶。寶傳子盛。盛傳叔父熙。寵溺苻氏而高雲弑熙自立。東燕凡二。

十有四年。雲立二年。而馮跋弑之。跋立十一年。而晉亡。是爲北燕。垂子寶立二年。而魏伐燕。寶出奔薊。慕容詳稱帝於中山。垂弟范陽王德。南徙滑臺自立。是爲南燕。傳兄子超。合十一年。太尉裕伐之。獲超。斬建康市。後秦自萇傳子興。及興子泓。三十有二年。當興之時。赫連勃勃據朔方。稱夏。勃勃在位十四年。而入宋。烏孤傳弟利鹿孤。利鹿孤傳弟傉檀。凡二十有一年。李暠傳子歆。凡二十有一年。沮渠蒙遜滅之。蒙遜立三十三年。傳子茂虔。立六年。爲魏所滅。魏後漸大。并諸國。盡有苻氏之地。蓋自晉失其政。十六國互興。

迭戰其閒謀臣碩士文德武功以及驕盈豪暴之徒  
固當世得失之林也嗟乎天下有道則劉淵石勒不  
失爲由余日磬天下無道而赤眉黃巾安在不足爲  
難然變起肘腋種類一心則郭欽江統之論其萬世  
有天下者之明鑑哉作十六國錄

漢

劉淵

劉和

劉聰

劉粲

劉曜

改號趙

劉淵字元海新興匈奴人冒頓之後也初漢高帝以  
宗女爲公主妻冒頓約爲兄弟其子孫遂冒姓劉氏  
建武初烏珠雷若鞮單于子右奧鞮日逐王比自立

爲南單于入居西河美稷。中平中其單于羌渠使子於扶羅將兵助漢討平黃巾。而羌渠爲國人所弑。於扶羅以其衆畱漢自立爲單于。屬董卓之亂。寇掠太原河東。屯於河內。於扶羅死。弟呼廚泉立。以扶羅子豹爲左賢王。漢建安末呼廚泉入朝於魏。魏武畱之於鄴。分其衆爲五部。以豹爲左部帥。太康中改置都尉。左部居太原。泣氏。右部居祁。南部居蒲子。北部居新興。中部居大陵。劉氏雖分爲五部。然皆家於晉陽汾水之濱。豹妻呼延氏。魏嘉平中祈子於龍門。其夜夢人以一物光景非常授呼延氏。曰。此日精也。服之。

生貴子。寤而告豹。豹曰吉徵也。自是十三月而生淵。  
左手文有其名。遂以名焉。幼好學。師事上黨崔游。習  
毛詩京氏易。馬氏尚書。尤好春秋左氏傳。孫吳兵法。  
嘗謂同門生朱紀范隆曰。吾每觀書傳。常鄙隨陸無  
武。絳灌無文。道由人宏。一物不知。君子恥之。二生遇  
高皇而不能建封侯之業。兩公屬太宗而不能開庠  
序之美。惜哉。於是遂學武事。而猿臂善射。膂力過人。  
身長八尺四寸。鬚長三尺餘。當心有三赤毫。長三尺  
六寸。太原王渾雅善之。命子濟拜焉。咸熙中。爲侍子。  
在洛陽。泰始時。渾屢言於武帝。帝召見與語。大悅之。

以爲由。余日磾之流。王渾以吳會未平。勸帝任以東  
南之事。孔恂。楊珧曰。非我族類。其心必異。淵若平吳。  
恐不復北渡矣。帝默然。後秦涼覆沒。疇咨將帥。上黨  
李熹。請帝發匈奴五部。假淵將軍。則秦涼可指期而  
定也。孔恂又不可。熹勃然曰。以匈奴之悍。淵之曉兵。  
何憂不滅虜。恂曰。非謂其不能也。正恐淵平涼州。斬  
樹機能。涼州方有難耳。淵久在雒陽。後王彌東歸。餞  
彌於九曲之濱。泣謂彌曰。王渾。李熹。以鄉曲見知。每  
相薦達。然非吾願也。吾本無宦情。恐死洛陽。永與子  
別。因慷慨歔歔。縱酒長嘯。坐者爲之流涕。豹卒。淵代

爲左部帥。太康末，拜北部都尉，明刑法，禁姦宄，輕財務施，推誠接物。五部僞傑及幽冀高門名士，無不至者。楊駿執政，拜淵建威將軍，五部大都督，封漢光鄉侯。元康末，坐部人叛出塞，免官。成都王穎鎮鄴，表淵行寧朔將軍，監五部軍事。當是時，寇盜蜂起，淵從祖故左賢王劉宣等竊議曰：「昔我先人與漢約爲兄弟，自漢亡，魏晉代興，我單于徒有虛號，降同編戶。今司馬氏骨肉相殘，四海鼎沸，興邦復業，此其時矣。」密共推淵爲大單于，使呼延攸詣鄴，以謀告淵。淵遂請歸會葬。穎弗許，乃令攸先歸。告宣等招集五部，引會宜。

陽諸胡。聲言應穎。實背之也。穎爲皇太弟。拜淵太弟。屯騎校尉。穎敗六軍於蕩陰。假淵冠軍將軍。封盧奴伯。并州刺史東嬴公騰。與安北將軍王浚。起兵伐穎。淵謂穎曰。今二鎮跋扈。衆餘十萬。請爲殿下還說五部。以赴國難。穎欲奉帝還洛陽。以避其鋒。淵曰。殿下武皇帝子。有殊勳於天下。王浚豎子耳。東嬴疎屬也。豈能與殿下爭衡哉。殿下發鄴宮。示弱於人。洛陽可復至邪。縱達洛陽。威權不在殿下矣。且東胡雖勁。不踰五部。請以二部梟二豎之首。穎乃拜淵爲北單于。參丞相軍事。永興元年八月。淵至左國城。劉宣等

上號爲大單于。旬日之間。衆四五萬。都於離石。浚將  
祁宏率鮮卑攻鄴。潁挾天子奔洛陽。淵聞之曰。成都  
不用吾言。逆自奔潰。真奴才也。然吾與之有言矣。不  
可以不救。部勒步騎二萬。使右於陸王劉景。左獨鹿  
王劉延年。擊鮮卑。劉宣等固諫曰。晉人奴隸御我。今  
父子兄弟自相魚肉。此天厭晉德。授之於我。單于積  
德在躬。方當復呼韓邪之業。鮮卑烏丸可以爲援。奈  
何拒之而拯讐敵乎。淵乃喟然曰。大丈夫當爲崇岡  
峻阜。何能爲培塿乎。夫帝王豈有常哉。顧惟德所授  
耳。今吾見衆十餘萬。皆一當晉十。上可成漢高之業。

下不失爲魏武。吾漢氏甥。約爲兄弟。兄亡弟紹。不亦可乎。十月。淵爲壇於左國城之南。自稱漢王。下令曰。昔我太祖高皇帝。以神武應期。廓開大業。太宗孝文皇帝。重以明德。升平漢道。世宗孝武皇帝。拓土攘夷。地過唐日。中宗孝宣皇帝。搜揚雋乂。多士盈朝。是我祖宗道邁三王。功高五帝。故卜年倍於夏商。卜世過於姬氏。而元成多僻。哀平祚短。賊臣王莽。滔天篡逆。我世祖光武皇帝。誕資聖武。恢復鴻基。祀漢配天。不失舊物。俾三光晦而復明。神器幽而復顯。顯宗孝明皇帝。肅宗孝章皇帝。累葉重暉。炎光再闡。自和安以

後皇綱漸頽。天步艱難。國統頻絕。黃巾海沸於九州。羣閹毒流於四海。董卓因之。肆其猖勃。曹操父子。凶逆相尋。故孝愍委棄萬國。昭烈播越岷蜀。冀否終有泰。旋軫舊京。何圖天未悔禍。後帝窘辱。自社稷淪喪。宗廟之不血食。四十年於茲矣。今天誘其衷。悔禍皇漢。使司馬氏父子兄弟。迭相殘滅。黎庶塗炭。靡所控告。孤今猥爲羣公所推。紹修三祖之業。顧茲阨閹。戰惶靡厝。但以大恥未雪。社稷無主。銜膽栖冰。勉從羣議。乃赦其境內。年號元熙。追尊後主爲孝懷皇帝。立漢高祖以下三祖五宗神主而祭之。立妻呼延氏爲

王后置百官，以劉宣爲丞相，崔游爲御史大夫，劉宏爲太尉，其餘拜授各有差。東嬴公遣將聶元伐漢，戰於大陵，元敗，騰遂率并州二萬餘戶而東。十二月，漢將劉曜寇大原，取涇氏，喬晞寇西河，取介休。介休令賈渾死之，將納其妻宗氏，宗氏罵晞而哭，晞又殺之。淵聞之大怒曰：「使天道有知，喬晞望有種乎？」追還降秩四等，收渾尸葬之。

丁卯永嘉元年，羣盜王彌、石勒、劉靈降漢，拜彌司隸校尉，離石大饑，遷於黎亭。遣將劉景擊并州刺史劉琨，琨敗之於板橋，乘勝據晉陽。